

全上古三代秦漢三國六朝文

全三國文卷四十

烏程嚴可均校輯

魏四十

鄭小同

小同、北海高密人。大司農鄭玄之孫。文帝時爲郎中。高貴鄉公卽位，進侍中。甘露中，爲五更。陳畱王初加光祿大夫，爲司馬。昭所鵠死，有禮義四卷。鄭志十一卷。

日蝕攷負議

史官不務審察晷度，謹綜疏密，謬準交會，曰爲其兆。至乃虛設疑日，大警外內。其有不效，則委于差晷度，禁縱自由，皆非其義。案春秋昭公三十一年十二月辛亥日蝕，晉史墨曰：「庚午之日，日始有謫。」自庚午至辛亥四十二日，日蝕之兆固形于前矣。此爲古有其法而今不察，是守官惰職，攷察無效，此有司之罪。通典七十八

張揖

揖字稚讓清河人一云河閒人魏初博士一云太和中爲博士有廣雅四卷

上廣雅表

博士臣揖言臣聞昔在周公續述唐虞宗翼文武尅定四海勤相成王踐阼理政日昃不食坐而待旦德化宣流越裳徠貢嘉禾貫桑六年制禮曰導天下箸爾雅一篇曰釋其意義傳于後學歷載五百墳典散零唯爾雅恆存禮三朝記哀公曰寡人欲學小辨曰觀于政其可乎孔子曰爾雅曰觀于古足曰辯言矣春秋元命包言子夏問夫子作春秋不曰初哉首基爲始何是曰知周公所造也率斯曰降超絕六國越踰秦楚爰暨帝劉魯人叔孫通撰置禮記文不違古今俗所傳三篇爾雅或言仲尼所增或言子夏所益或言叔孫通所補或言邾郡梁文所攷皆解家所說先師口傳既

無正論聖人所言是故疑不能明也夫爾雅之爲書也文約而義固其險道也精研而無誤眞七經之檢度學問之階路儒林之楷素也若其包羅天地綱紀人事權揆制度發百家之訓詰未能悉備也臣揖體質蒙蔽學淺詞頑言無尼取竊曰所識擇擇羣莛文同義異音轉失讀八方殊語庶物易名不在爾雅者詳錄品覈已箸于篇凡萬八千一百五十文分爲上中下三類方徠俊哲洪秀偉彥之倫扣其兩端摘其過謬今得用請亦所企想也臣揖誠惶誠恐頓首頓首死罪死罪

孫該

該字公達任城人爲郎中遷博士司徒右長史著作郎出爲陳郡太守有集二卷

三公山下神祠賦

并序

趙國元氏縣西界有六神祠吾觀其一焉在陘山之陽卽三公祠

三三圖卷四
焉崇堂既峻危閣造雲櫺軒臨萬仞之壑土木被丹藻之華是時
寓目永日夕宿東序召彼故老訊之舊典云棟宇初興七十載三
台耀靈實降甘雨夫山已有形爲神神已無形爲主若乃歆烝于
上雷動于下公田禴于多黍嫠婦利其滯穗亦茲邦之所已報歷
葉不輟也于是援筆作賦昭神靈之有憑壯夏屋之弘麗

南極鬱紆飛龍在天太一白石巨靈據山二后殊位惟公在焉下
則歸雲蓬勃綠水流離爭湍趣戾衝石會谿高岸爲谷峽峴阻脆
梗林柰條逼塗迮蹊行者息駕步趾于斯陟大峰登岑岡踰爽塏
歷朝陽睚華殿之顯敞覩應門之寤寤神衣鬱蔚百堵周乎洞房
進排闥闔顧眄靈堂聚楹列峙丹飾煌煌千櫺浮跂天躋騰驤累
層岌嶮齊載長梁敷山藻于前稅綴榱桷已采章文綺腹其紛鱗
洪葩睚已披揚爾乃逡巡降趾遊坐東廂日不逮昏炎燎已光縣
宰致祀嘉旨備饗陰祚顯應徧澤圻疆普此士女樂彼豐穰其

曰坤作地勢恆岳吐精布濩騾路上秀太清三后讚事兩師不靈
有滄淒淒潤我羣生先人諒德圖象垂形攷之舊史典謨無聲類聚七十九初學記十二自孔六帖案書鈔一百四十八引孫
說三公山下輿賦云九嶷白醴宋知卽孫該之誤否三公山在燕
地而孫說劉宋人豈江南亦有此山邪附記于此俟攷
琵琶賦

惟嘉桐之奇生于丹澤之北垠下修條曰迴固上糾紛而干雲開
黃鍾曰挺幹表素質于蒼春然後託乎公班妙意橫施四分六合
廣裘應規迴風臨樂刻飾流離弦則岱谷縈絲篴貢天府伯奇執
輓杞妻抽緒大不過宮細不過羽清朗緊勁絕而不茹伶人鼓焉
景響豐稂操賜駱驛遊乎風颺抑揚案捻拒擲摧藏爾乃叩少宮
騁明光發下柱展上腔儀蔡氏之繁弦放莊公之倍簧于是酒酣
日晚改爲秦聲壯諒抗慨土風所生延年度曲六彈俱成絀邪存
正疏密有程離而不散滿而不盈沈而不重浮而不輕綿駒遺謳

岱宗梁父淮南廣陵郢中激楚每至曲終歌闌亂已眾契上下奔

驚鹿奔猛厲波騰雨注飄飛電逝舒疾無方下闕藝文類聚四

引三條又文選稽叔夏贈秀才入軍詩

注又曹子建七般注又御覽八百八

緩調平絃原本反始溫雅冲泰弘暘通理初學記十六

諸葛誕

誕字公休琅邪陽都人黃初中召尚書郎爲滎陽令明帝時入
爲吏部郎累遷御史中丞尚書免齊王時復爲御史中丞尚書
出爲揚州刺史加昭武將軍尋爲鎮東將軍假節都督揚州對
山陽亭侯徙鎮南將軍高貴鄉公時復爲鎮東大將軍儀同三
司都督揚州進封高平侯轉征東大將軍徵爲司空不受遂反
大將軍司馬昭討斬之

殺樂綝表

臣受國重任統兵在東揚州刺史樂綝專詐說臣與吳交通又言

被詔當代臣位無狀日久臣奉國命已死自立終無異端忿懣不忠輒將步騎七百人召今月六日討絀即日斬首函頭驛馬傳送若聖朝明臣臣卽魏臣不明臣臣卽吳臣不勝發憤有日謹拜表陳愚悲感泣血哽咽斷絕不知所如乞朝廷察臣至誠魏志諸葛亮傳

毋巨儉

儉字仲恭河東聞喜人將作大匠興子爲平原侯文學明帝初爲尙書郎遷羽林監出爲洛陽典農遷荊州刺史青龍中徙幽州刺史加渡遼將軍護烏丸校尉召功封安邑侯尋遷左將軍領豫州刺史轉鎮南將軍徙鎮東將軍都督揚州正元二年矯明元郭太后詔討司馬師眾潰見殺有集二卷

承露盤賦

偉神盤之殊異邈迢迢召秀峙已上二句依御覽七百五十八增樹根芳林濯景

天池嘉木靈草綠葉素枝飛閣鱗接而從連層臺偃蹇曰橫施龜
龍怪獸嬉遊乎其中詭類壯觀雜遝衆多若乃肇制模範應變入
神窮數極理究盡物倫命班爾召消均撰蘭籍簡良辰采名金于
崑丘斬扶桑曰爲薪詔燭龍使吐火運混元曰陶甄岐陰陽而役
神物豈取力于烝民用能弗經弗營不日而成匪雕匪斲天挺之
靈雄幹碣曰高立干雲霧而上征蓋取象于蓬萊寶神明之所憑
峻極過于閭風鳳高翔而弗升遠而望之若紫霓下鄰雙鵠集焉
卽而視之若璆琳之柱華蓋在端上際辰極下通九原中承仙掌
旣平且安越古今而無匹信奇異之可觀又能致休徵曰輔性豈
徒虛設于芳園采和氣之精液承清露于飛雲

載文類聚
七十三

罪狀司馬師表

故相國懿匡輔魏室歷事忠貞故烈祖明皇帝授曰寄託之任懿
戮力盡節曰盡華夏又曰齊王聰明無有穢德乃心勤盡忠曰輔

上天下賴之懿欲討滅二虜曰安字內始分軍糧克時同舉未成而薨齊王曰懿有輔已大功故遂使師承統懿業委曰大事而師曰盛年在職無疾託病坐擁彊兵無有臣禮朝臣非之義士譏之天下所聞其罪一也懿造計取賊多奪軍糧克期有日師爲大臣當除國難又爲人子當卒父業哀聲未絕而便罷息爲臣不忠爲子不孝其罪二也賊退過東關坐自起眾王征同進喪眾敗績歷年軍實一旦而盡致使賊來天下騷動死傷流離其罪三也賊舉國悉眾號五十萬來向壽春圖詣洛陽會太尉爭與臣等建計乃杜塞要險不與爭鋒還固新城淮南將士衝鋒履刃晝夜相守勤瘁百日死者塗地自魏有軍已來爲難苦甚莫過于此而師遂意自由不論封賞權勢自在無所領錄其罪四也故中書令李豐等曰師無人臣節欲議退之師知而請豐其夕拉殺載尸埋棺豐等爲大臣帝王腹心擅加酷暴死無罪名師有無君之心其罪五也

懿每歎說齊王自堪人主君臣之義定奉事曰來十有五載始欲
歸政按行武庫詔問禁兵不得妄出師自知姦慝人神所不佑矯
發君主加之曰罪乎師之叔父性甚仁孝追送齊王悲不自勝羣
臣皆怒而師懷忍不顧大義其罪六也又故光祿大夫張緝無罪
而誅夷其妻子并及母后逼恐至尊彊催督遣臨時哀愕莫不傷
痛而師稱慶反曰歡喜其罪七也陛下踐阼聰明神武事經聖心
欲崇省約天下聞之莫不歡慶而師不自改悔修復臣禮而方徵
兵募士毀壞宮內列侯自衛陛下卽阼初不朝覲陛下欲臨幸師
舍曰省其疾復拒不通不奉法度其罪八也近者領軍許允當爲
鎮北曰廚錢給賜而師舉奏加辟雖云流徙道路餓殺天下聞之
莫不哀傷其罪九也三方之守一朝闕廢多選精兵曰自營衛五
營領兵闕而不補多載器械充聚本營天下所聞人懷憤怨譎言
盈路曰疑海內其罪十也多休守兵曰占高第曰空虛四表欲擅

彌勢已逞姦心募取屯田加其復賞阻兵安忍壞亂舊法合聚諸
藩王公曰著鄴欲悉誅之一旦舉事廢主天不長惡使日脛不成
其罪十一也臣等先人皆隨從太祖武皇帝征討凶暴獲成大功
與高祖文皇帝卽受漢禪開國承家猶堯舜相傳也臣與安豐護
軍鄭翼廬江護軍呂宣太守張休淮南太守丁尊督守合肥護軍
王休等議各曰累世受恩千載風塵思盡軀命呂完全社稷安主
爲效斯義苟立雖焚妻子吞炭漆身死而不恨也案師之罪宜加
大辟曰彰姦慝春秋之義一世爲善十世宥之懿有大功海內所
書依古典議廢師曰侯就第弟昭忠肅寬明樂善好士有高世君
子之度忠誠爲國不與師同臣等碎首所保可曰代師輔導聖躬
太尉乎忠孝小心所宜親寵授曰保傅護軍散騎常侍望忠公親
事當官稱能奉迎乘輿有宿衛之功可爲中領軍春秋之義大義
滅親故周公誅弟石碯戮子季友鳩兄上爲國計下全宗族殛鯀

用禹聖人明典、古今所稱、乞陛下下臣等所奏朝堂博議、臣言當道使師遜位、避賢者、罷兵去備、如三皇舊法、則天下協同、若師負勢恃眾、不自退者、臣等率將所領、晝夜兼行、惟命是授、臣等今日所奏、惟欲使大魏永存、使陛下得行君意、遠絕亡之禍、百姓安全、六合一體、使忠臣義士、不愧于三皇五帝耳、臣恐兵起天下、擾亂臣輒上事、移三征及州郡國典農、各安慰所部吏民、不得妄動、謹具目狀聞、惟陛下愛養精神、明慮危害、曰、蓋海內師專權用勢、賞罪自由、聞臣等舉眾、必下詔禁絕關津、使驛書不通、擅復徵調、有所收捕、此乃師詔、非陛下詔書、在所皆不得復承用、臣等道遠、懼文書不得皆通、輒臨時賞罰、已便宜從事、須定集上也、魏志毋丘儉傳注、

表

禹禹之朝不畜庸才

文選任昉爲齊明帝讓宣滅鄒公第一表注、

諫明帝治宮室疏

臣愚曰爲天下所急除者二賊所急務者衣食誠使二賊不滅士

民飢凍雖崇美宮室猶無益也

魏志毋丘儉傳時爲洛陽典農

上疏請定遼東

景初元年七月

陛下卽位已來未有可書吳蜀恃險未可卒平聊可已此方無用

之士克定遼東

魏志衛臻傳

上言劉整鄭像宜差異子弟

昔諸葛恪圍合肥新城城中遣士劉整出圍傳消息爲賊所得攷問所傳語整曰諸葛公欲活汝汝可具服整罵曰死狗此何言也我當必死爲魏國鬼不苟求活遂汝去也欲殺我者便速殺之終無他辭又遣士鄭像出城傳消息或曰語恪恪遣馬騎尋圍跡索得像還四五人的頭面縛將繞城表敕語像使大呼言大軍已還洛不如早降像不從其言更大呼城中曰大軍近在圍外壯士努力賊曰刀築其口使不得言像遂大呼令城中聞知整像爲兵能

守義執節子弟宜有差異

魏志齊王芳紀嘉平六年鎮東將軍毋丘儉上言

與大將軍曹爽書薦裴秀

生而岐嶷長蹈自然立靜守真性入道輿博學強記無文不該孝

友著于鄉黨高聲聞于遠近誠宜弼佐謨明助和鼎味毗贊大府

光昭盛化非徒子奇甘羅之儔兼包游夏顏冉之美

晉書裴秀傳時儉為度遠

將軍

報弟書

今別致絳二百疋可召供送葬之事

北堂書鈔御覽八百十四

承露盤銘

赫赫聖魏紹天惟則承露瑰生爰詔懿德下有蛟龍偃蹇虬紛上

有層盤厲彼青雲修莖擢擢高弗可及仙掌峩峩零露是集有直

其體有固斯基休徵攸降神明攸持少昊惟好我后斯同已近眉

壽曰保萬邦

魏文類聚卷七十三

秦靜

靜爲博士、進祕書監、

祠祀不宜稱詔議

祭法七祀有國行、今月令謂行爲井、是俗廢行而祀井、武帝始定天下、興復舊祀、造祭祀門戶井竈中霤、文帝稱詔、靜案凡諸祠祀所曰尊敬神靈、不宜稱詔、御覽五百二十九引魏名臣奏、

臘用日議

吉禮出行有祖祭、歲終聚合百物祭宗廟、謂之蜡、皆有常日、臨時造請而用之、又無正月祖祭之禮、漢氏曰午祖、曰戌臘、午者南方之象、故曰午祖、正月爲歲首、故曰寅始、用午祖戌者、歲之終、萬物畢成、故曰戌臘而小數之、學因就傳、著五行曰爲說、皆非典籍經義之文也、尙書易經說五行水火金木土王相衍天地陰陽之義、故易曰坤爲土、土位西南、黃精之君、盛德在未、故大魏曰未祖戌

者歲終日窮之辰不宜巳為歲初祖祭之行始也易曰坤利西南得朋東北喪朋丑者土之終故巳丑臘終而復始乃終有慶宜如

前巳未祖丑臘

通典四十四又略見續漢禮儀志神祇類

上瑞圖告廟議

靈命瑞圖可祀天皇大帝五精之帝于洛陽祀南郊所祭祭訖奉

誥冊文脯醢酒告太祖廟藏冊于石函

通典十五

冕服議

漢氏承秦改六冕之制俱玄冠絳衣而已

宋書禮志五

上告瑞祝文

孝孫皇帝諱使太尉臣某言靈命瑞圖冊告于天郊事訖將納冊

于石函謹使太常臣某帥有司言脯醢旨酒敢昭告于皇祖武皇

帝言武皇后卞氏配尚饗

通典十五

辭悌

悌字孝威東郡人爲兗州從事拜泰山太守曹公定冀州引爲
長史除魏郡太守黃初中拜尙書令太和末歷督軍中領軍青
龍中爲尙書

奏請瑞圖告廟

涼州刺史所上靈命瑞圖當下洛陽畱臺使太尉醺告太祖文昭

皇后廟

通典五十五

趙怡

怡太和中爲博士

祀天樂用宮懸議

古無四懸自周始耳未有作古樂而用近懸也案今天地之樂懸
謂之上下管與虞舜笙鏞同不言二懸宜如故事但設上下管而

已

通典一百四十七

皇后銘旌議

祖號所曰稱廟不宜曰題旌禮未有主作重既葬而埋之故銘旌
宜與重俱埋廟門外之左通典八十四

左延年

延年太和中爲叶律中郎將

祀天樂用宮懸議

案周禮曰雲門祀天咸池祀地又今宗廟用宮懸則祀天地宜用

宮懸通典一百四十七

和洽

洽字陽士汝南西平人太和中爲太常卒謚簡侯

時風不至奏宜節儉

民稀耕少浮食者多國曰民爲本民曰穀爲命故費一時之農則
失育命之本是曰先王務蠲煩費曰專耕農自春夏曰來民窮于
役農業有廢百姓蹙然時風不至未必不由此也消復之術莫大

于節儉太祖建立洪業奉師徒之費供軍賞之用吏士豐于資食倉府衍于穀帛由不飾無用之宮絕浮華之費方今之要固在息省勞煩之役捐除他餘之務已爲軍戎之儲三邊守禦宜在備豫料賊虛實蓄士養眾算廟勝之策明攻取之謀詳詢眾庶已求厥中若謀不素定輕弱小敵軍人數舉舉而無庸所謂悅武無震古人之誠也

魏志和洽傳

趙咨

咨字君初河內溫人太和中爲尙書遷太常

見司馬朗傳案後漢書有趙咨誤

志孫權傳又有趙咨字德度南陽人皆非即此

奏諫興作

臣咨言今作洛陽宮殿取白石之人鑛山索異石繁石求雲母口

役之事莫過于此也

書鈔一百六十引魏名臣奏

奏論賜諡

其諸襲爵守嗣無殊才異勳于國及未冠成人皆不應賜諡通典一百四

奏明帝外祖母服

哭敬侯夫人張帷幕端門外之左羣臣位如朝皇帝黑介幘進賢冠卑服十五舉聲則罷通典八十一

程喜

喜字申伯青龍中青州刺史齊王時爲征北將軍

答詔問管寧

寧有族人管貢爲州吏與寧鄰比臣常使經營消息貢說寧常著卑帽布襦袴布裙隨時單複出入閭庭能自任杖不須扶持四時祠祭輒自力強改加衣服著絮巾故在遼東所有白布單衣親薦饌饋跪拜成禮寧少而喪母不識形象常特加觴泣然流涕又居宅離水七八十步夏時詣水中澡灑手足闢于園圃臣揆寧前後

辭讓之意獨自己生長潛逸者艾智衰是已棲遲每執謙退此盜志行所欲必全不爲守高

魏志管
監傳

張茂

茂字彥林沛人青龍中爲太子舍人

上書諫明帝奪士女已配戰士

臣伏見詔書諸士女嫁非士者一切錄奪已配戰士斯誠權時之宜然非大化之善者也臣請論之陛下天子之子也百姓吏民亦陛下之子也禮賜君子與小人不同日所已殊貴賤也更屬君子士爲小人今奪彼已與此亦無已異于奪兄之妻妻弟也于父母之恩偏矣又詔書聽得已生口年紀顏色與妻相當者自代故富者則傾家盡產貧者舉假貸貴買生口已贖其妻縣官已配士爲名而實內之掖庭其醜惡者乃出與士得婦者未必有懽心而失妻者必有憂色或窮或愁皆不得志夫君有天下而不得萬姓之

懽心者、尠不危殆、且軍師在外、數千萬人、一日之費、非徒千金、舉天下之賦、已奉此役、猶將不給、況復有宮庭非員、無錄之女、椒房母后之家、賞賜橫興、內外交引、其費半軍、昔漢武帝好神仙、信方士、掘地爲海、封土爲山、賴是時天下爲一、莫敢與爭者耳、自衰亂已來、四五十載、馬不捨鞍、士不釋甲、每一交戰、血流丹野、創痍號痛之聲、于今未已、猶彊寇在疆、圖危魏室、陛下不兢兢業業、念崇節約、思所已安天下者、而乃奢靡是務、中尙方純作玩弄之物、炫耀後園、建承露之盤、斯誠使耳目之觀、然亦足已騁寇讐之心矣、惜乎舍堯舜之節儉、而爲漢武之侈事、臣竊爲陛下不取也、願陛下沛然下詔、萬機之事、有無益而有損者、悉除去之、已所除無益之費、厚賜將士父母妻子之飢寒者、問民所疾、而除其所惡、實倉廩、繕甲兵、恪恭已臨天下、如是吳賊面縛、蜀虜輿櫬、不待誅而自服、太平之路、可計日而待也、陛下可無勞神思于海表、軍師高枕

戰士備員。今羣公皆結舌。而臣所已不敢不獻警言者。臣昔上要
言。散騎奏臣書。已聽諫。篇爲善。詔曰是也。擢臣爲太子舍人。且臣
作書。譏爲人臣不能諫諍。今有可諫之事。而臣不諫。此爲作書虛
妄。而不能言也。臣年五十。常恐至死無日報國。是已投軀沒命。冒
昧已聞。惟陛下裁察。魏志明帝紀注引魏略太
子舍人張俊乃上書諫

賜進士出身二品銜廣東等處提刑按察使司按察使兼管驛傳事務黃岡王毓藻校刊

全三國文卷四十終

全三國文卷四十一

烏程嚴可均校輯

魏四十一

杜摯

摯字德魯河東人明帝時郎中令補校書郎有集二卷

笳賦

并序

昔李伯陽避亂西入戎戎越之思有懷土風遂造斯樂美其出入

戎貉之思有大韶夏音

宋書樂志一文選西京賦注通典一百四十四御覽五百八十一

唯葭蘆之爲物諒繫動之自然託妙體于阿澤歷百代而不遷于

是秋節既至百物具成嚴霜告殺草木殞零賓鳥鼓翼蟋蟀悲鳴

羈旅之士感時用情乃命狄人操笳揚清吹東角動南徵清羽發

濁商起剛柔待用五音迭進倏爾卻轉忽焉前引或縕縕已和懌

或悽悽已嘒殺或漂淫已輕浮或遲重已沈滯

藝文類聚四十四

文欽

欽字仲若，謫人。明帝時爲五營校督，出爲牙門將，轉廬江太守。鷹揚將軍尋加冠軍將軍。齊王時，爲前將軍，代諸葛誕爲揚州刺史。高貴鄉公初，與母王儉舉兵討大將軍司馬師，兵敗入吳，爲都護，假節鎮北大將軍、幽州牧，封譙侯。後救諸葛誕，爲誕所殺。

降吳表

稟命不幸，常隸魏國，而絕于天。雖側伏隅都，自知無路。司馬師滔天作逆，廢害二主，卒癸高粹，惡不足喻。欽累世受魏恩，烏鳥之情，竊懷憤踊。在三之義，期于弊仆，前與母王儉、郭淮等俱舉義兵，當共討師，埽除凶孽。誠臣悞悞，愚管所執，智慮淺薄，微節不勝，進無所依，悲痛切心。退惟不能扶翼本朝，抱愧俛仰，靡所自厝。管緣古義，固有所歸。庶假天威，得展萬一。僮仆之目，亦所不恨。輒相率將

歸命聖化、慙偷苟生、非辭所陳、謹上還所受魏使持節前將軍山
桑侯印綬、臨表惶惑、伏須罪誅、魏志明王
儉傳注

與郭淮書

大將軍昭伯與太傅伯俱受顧命、登牀把臂、託付天下、此遠近所
知、後呂勢利、乃絕其祀、及其親黨、皆一時之俊、可爲痛心、奈何奈
何、公侯特與大司馬公恩親分、著義貫金石、當此之時、想益毒痛、
有不可堪也、王太尉嫌其專朝、潛欲舉兵、事竟不捷、復受誅夷、害
及楚王、想甚追恨、太傅既亡、然其子師、繼承父業、肆其虐暴、日月
滋甚、放主弑后、殘戮忠良、包藏禍心、遂至篡弑、此可忍也、孰不可
忍、欽呂名義大故事、君有節、忠憤內發、忘寢與食、無所吝顧、也會
毋丘子邦自與父書、騰說公侯盡事主之義、欲奮白髮、同符太公、
惟須東問、影響相應、聞問之日、能不慷慨、是呂不顧妻孥之痛、卽
與毋丘鎮東舉義兵三萬餘人、西趨京師、欲扶持王室、埽除姦逆、

企踵西望、不得聲問、魯望高子、不足喻急、夫當仁不讓、況救君之
難、度道遠、艱故不果期要耳、然同舟共濟、安危勢同、禍痛已連、非
言飾所解、自公侯所明也、共事曹氏、積信魏朝、行道之人、皆所知
見、然在朝之士、冒利偷生、烈士所恥、公侯所賤、賈豎所不忍爲也、
況當塗之士邪、軍屯住項、小人呂閏、月十六日別進兵、就于樂嘉
城討師、師之徒眾、尋時崩潰、其所斬截、不復訾原、但當長驅徑至
京師、而流言先至、毋丘不復詳之、更謂小人爲誤諸軍、便爾瓦解、
毋丘還走、追尋釋解、無所及、小人還項、復遇王基等十二軍、追尋
毋丘進兵、討之、卽時克破、所向全勝、要邠後無繼何、孤軍梁昌進
退失所、還據壽春、壽春復走、狼狽躡閭、無復他計、惟當歸命大吳、
借兵乞食、繼踵伍員耳、不若僕隸如何快心、復君之讎、永使曹氏
少享血食、此亦大國之所佑念也、想公侯不使程嬰杵臼擅名于
前代、而使大魏獨無鷹揚之士、與今大吳敦崇大義、深見愍悼、然

僕于國大分連接遠同一勢日欲俱舉分分中國不願偏取已爲已有公侯必欲共忍帥冒懷宜廣大勢恐秦川之卒不可孤舉今者之計宜屈已伸人託命歸漢東西俱舉爾乃可克定師黨耳深思鄙言若愚計可從宜使漢軍克制期要使六合校攷與周召同封已託付兒孫此亦非小事也大丈夫寧處其落落是已遠呈忠

心時望嘉應

魏志明王儉傳注

辭諧

謂明帝時博士

王澹母出還葬議

春秋原心定罪仲尼稱父有爭子然則論罪不可已不原心爲子不可已不義諍來書云尊親已不幸遘疾不任理喪禮疾飲酒食肉蓋急于性命而權正理也夫厚養忘哀禮之所許況尊親嬰沈篤疾而被七出之罰乎向使曩時家有壯子明證本末直道而爭

豈令慈母已非罪受不義哉攷諸典禮稽之原情其昭告先靈還安域兆使嚴父無違禮之舉慈母雪沒代之恥不亦可乎通典一百二

楊暨

暨字休先熒陽人驍騎將軍恪之子明帝時為中領軍將軍卒諡肅侯

上明帝表

武皇帝始征張魯已十萬之眾身親臨履指受方略因就民麥已為軍糧張衛之守蓋不足言地險守易雖有精兵虎將勢不能施對兵三日欲抽軍還言作軍三十年一朝持與人如何此計已定天祚大魏魯守自壞因已定之魏志張魯傳注引魏名臣奏

隱蕃

蕃青州人明帝使詐叛歸吳求作廷尉已離開大臣事覺閉口而死

歸吳上書

臣聞紂爲無道，微子先出，高祖寬明，陳平先入。臣年二十二，委棄封域，歸命有道，賴蒙天靈，得自全致。臣至止，有日而主者同之，降人未見精別，使臣微言妙旨，不得上達於邑三歎，曷惟其已。謹詣闕拜章，乞蒙引見。

吳志胡綜傳

丁謚

謚字彥靖，沛國人。明帝時爲度支郎中，齊王時遷散騎常侍，轉尚書，坐曹爽誅。

肉刑論

堯典曰：象之典刑，流宥五刑，鞭作官刑，朴作教刑，金作贖刑，怙終賊刑。咎繇曰：天討有罪，五刑五用哉。呂刑曰：蚩尤惟始作亂，延及于平人，罔不寇賊，鴟義，姦宄寇攘，矯虔苗人，惟作五虐之刑，曰法，殺戮無辜，爰始淫爲刑剝，斲黥案此肉刑，在于蚩尤之代，而堯舜

曰流放代之故黥剔之文不載唐虞之籍而立刑之數亦不具于聖人之旨也禹承舜禪與堯同治必不釋二聖而遠則兇頑固可知矣湯武之王獨將奚取于呂侯故叔向云三辟之興皆叔世也此則近君子有徵之言矣

通典一百六十八

杜布

布明帝時爲博士

會喪宜去冠議

論語曰羔裘玄冠不曰弔故周人去玄冠代曰素弁漢去玄冠代曰布巾亦王者相變之儀未必獨非也古禮野夫著巾古者軍禮韋弁冠今者赤幘此明轉相變易不可悉還及古今宜因漢氏故事又案漢儀注諸侯王薨天子遣使者往皆言使者素服又禮自天子下達于士臨殯斂之事去玄冠曰素弁君子臨喪必有哀素之心是曰去玄冠代之曰素是曰漢中興臨喪之事與禮合自是

之後或言臨喪使者常吉服布巾、曰爲使者亦宜去玄冠、代曰布巾、示不純吉、侍中散騎諸會喪亦宜去玄冠、代曰布巾、

通典八十八

杜希

張敳

敳、明帝時博士、

薨卒不祿議

諸王公大將軍縣亭侯、曰上有爵土者、依諸侯禮、皆稱薨、關外侯無土銅印、當古稱卒、千石六百石下至二百石、皆詣臺拜受、與古士受命同、依禮稱不祿、

通典八十三

杜恕

恕、字務伯、京兆杜陵人、尚書僕射畿子、明帝時爲散騎侍郎、轉黃門侍郎、出爲弘農太守、齊王時、轉趙相、曰疾去、擢河東太守、遷淮北都督、護軍、復曰疾去、拜御史中丞、出爲幽州刺史、加建

威將軍使持節護烏丸校尉免爲庶人戊章武卒有體論四卷

篤論四卷

案篤論卽杜氏新書

表韓觀王昶

韓觀王昶信有兼才高官重任不但三州

魏志徐逸傳注引魏名臣奏黃門侍郎杜恕表

請令刺史專民事勿典兵疏

帝王之道莫尚乎安民安民之術在于豐財豐財者務本而節用也方今二賊未滅戎車亟駕此自熊虎之士展力之秋也然搢紳之儒橫加榮慕扼腕抗論曰孫吳爲首州郡牧守咸共忽恤民之術脩將率之事農桑之民競干戈之業不可謂務本帑藏歲虛而制度歲廣民力歲衰而賦役歲興不可謂節用今大魏奄有十州之地而承喪亂之弊計其戶口不如往昔一州之民然而二方僭逆北虜未賓三邊遭難繞天略市曰所統一州之民經營九州之地其爲艱難譬策羸馬曰取道里豈可不加意愛惜其力哉曰武

皇帝之節儉，府藏充實，猶不能十州擁兵郡且二十也。今荆揚青徐幽并雍涼緣邊諸州皆有兵矣。其所恃內充府庫，外制四夷者，惟充豫司冀而已。臣前曰州郡典兵，則專心軍功，不勤民事，宜別置將守，曰盡治理之務。而陛下復曰冀州寵秩呂昭，冀州戶口最多，田多墾闢，又有桑棗之饒，國家徵求之府，誠不當復任曰兵事也。若曰北方當須鎮守，自可專置大將。曰鎮安之計，所置吏士之資，與兼官無覺。然昭于人才，尙復易中朝苟乏人兼才者，勢不獨多。曰此推之，知國家曰人擇官，不爲官擇人也。官得其人，則政平訟理，政平故民富實。訟理故固圉空虛。陛下踐阼，天下斷獄百數十人，歲歲增多，至五百餘人矣。民不益多，法不益峻。曰此推之，非政教陵遲，牧守不稱之明效歟。往年牛死，通率天下，十能損二麥，不半收。秋種未下，若二賊游魂于疆場，飛芻輓粟，千里不及。究此之術，豈在彊兵乎？武士勁卒，愈多愈多，愈病耳。失天下猶人之體。

腹心充實四支雖病終無大患今充豫司冀亦天下之腹心也是
呂愚臣悽悽實願四州之牧守獨脩務本之業呂堪四支之重然
孤論難持犯欲難成眾怨難積疑侶難分故累載不爲明主所察
凡言此者類皆疏賤疏賤之言實未易聽若使善策必出于親貴
固不犯四難呂求忠愛此古今之所當患也

魏志杜
畿傳

議攷課疏

書稱明試呂功三考黜陟誠帝王之盛制使有能者當其官有功
者受其祿譬猶烏獲之舉千鈞良樂之選驥足也雖歷六代而考
績之法不著關七聖而課試之文不垂臣誠呂爲其法可粗依其
詳難備舉故也語曰世有亂人而無亂法若使法可專任則唐虞
可不須稷契之佐殷周無費伊呂之輔矣今奏考功者陳周漢之
云爲掇京房之本旨可謂明考課之要矣于呂崇揖讓之風興濟
濟之治臣呂爲未盡善也其欲使州郡考士必由四科皆有事效

然後察舉試辟公府爲親民長吏轉曰功次補郡守者或就增秩賜爵此最考課之急務也臣曰爲便當顯其身用其言使具爲課州郡之法法具施行立必信之賞施必行之罰至于公卿及內職大臣亦當俱曰其職考課之也古之三公坐而論道內職大臣納言補闕無善不紀無過不舉且天下至大萬機至衆誠非一明所能徧照故君爲元首臣爲股肱明其一體相須而成也是曰古人稱廊廟之材非一木之枝帝王之業非一士之略由是言之焉有大臣守職辨課可曰致雍熙者哉且布衣之交猶有務信誓而蹈水火感知己而披肝膽狗聲名而立節義者況于束帶立朝致位卿相所務者非特匹夫之信所感者非徒知己之惠所徇者豈聲名而已乎諸蒙寵祿受重任者不徒欲舉明主于唐虞之上而已身亦欲廁稷契之列是曰古人不患于念治之心不盡思于自任之意不足此誠人主使之然也唐虞之君委任稷契夔龍而責成

功及其罪也。殛鯨而放四凶。今大臣親奉明詔。給事目下。其有夙
夜在公。恪勤特立。當官不撓貴勢。執平不阿所私。危言危行。已處
朝廷者。自明主所察也。若尸祿已爲高拱。默已爲智。當官苟在于
免負。立朝不忘于容身。絜行遜言。已處朝廷者。亦明主所察也。誠
使容身保位。無放退之辜。而盡節在公。抱見疑之勢。公義不脩。而
私議成俗。雖仲尼爲謀。猶不能盡一才。又況于世俗之人乎。今之
學者。師商韓而上法術。競已儒家爲迂闊。不周世用。此最風俗之
流弊。創業者之所致愼也。魏志杜畿傳又通典十五

諫聽廉昭言事疏

伏見尙書郎廉昭奏左丞曹璠。已罰當關。不依詔坐判問。又云。諸
當坐者。別奏尙書。令陳矯自奏。不敢辭罰。亦不敢已處。重爲恭意。
至懇惻。臣竊憫然。爲朝廷惜之。夫聖人不擇世而興。不易民而治。
然而生必有賢智之佐者。蓋進之已道。率之已禮故也。古之帝王

之所已能輔世長民者莫不遠得百姓之歡心近盡羣臣之智力誠使今朝任職之臣皆天下之選而不能盡其力不可謂能使人若非天下之選亦不可謂能官人陛下憂勞萬機或親燈火而庶事不康刑禁日弛豈非股肱不稱之明效歟原其所由非獨臣有不盡忠亦主有不能使百里奚愚于虞而智于秦豫讓苟容中行而著節智伯斯則古人之明驗矣今臣言一朝皆不忠是誣一朝也然其事類可推而得陛下感帑藏之不充實而軍事未息至乃斷四時之賦衣薄御府之私穀帥由聖意舉朝稱明與聞政事密勿大臣寧有懇懇憂此者乎騎都尉王才幸樂人孟思所爲不法振動京都而其罪狀發于小吏公卿大臣初無一言自陛下踐阼已來司隸校尉御史中丞寧有舉綱維已督姦宄使朝廷肅然者邪若陛下已爲今世無良才朝廷乏賢佐豈可追望稷契之遐蹤坐待來世之倘又乎今之所謂賢者盡有大官而享厚祿矣然而

奉上之節未立向公之心不一者委任之責不專而俗多忌諱故也臣曰爲忠臣不必親親臣不必忠何者曰其居無嫌之地而事得自盡也今有疏者毀人不實其所毀而必曰私報所憎譽人不實其所譽而必曰私愛所親左右或因之曰進憎愛之說非獨毀譽有之政事損益亦皆有嫌陛下當思所曰闡廣朝臣之心篤厲有道之節使之自同古人望與竹帛耳反使如廉昭者擾亂其閒臣懼大臣遂將容身保位坐觀得失爲來世戒也昔周公戒魯侯曰無使大臣怨乎不曰不言賢愚明皆當世用也堯數舜之功稱去四凶不言大小有罪則去也今者朝臣不自曰爲不能曰陛下爲不任也不自曰爲不智曰陛下爲不問也陛下何不遵周公之所日用大舜之所曰去使侍中尙書坐則侍帷幄行則從華輦親對詔問所陳必達則羣臣之行能否皆可得而知忠能者進闇劣者退誰敢依違而不自盡曰陛下之聖明親與羣臣論議政事使

羣臣人得自盡人自曰爲親人思所曰報賢愚能否在陛下之所
用曰此治事何事不辨曰此建功何功不成每有軍事詔書常曰
誰當憂此者邪吾當自憂耳近詔又曰憂公忘私者必不然但先
公後私卽自辨也伏讀明詔乃知聖思究盡下情然亦怪陛下不
知其本而憂其末也人之能否實有本性雖臣亦曰爲朝臣不盡
稱職也明主之用人也使能者不敢遺其力而不能者不得處非
其任選舉非其人未必爲有罪也舉朝共容非其人乃爲怪耳陛
下知其不盡力也而代之憂其職知其不能也而敎之治其事豈
徒主勞而臣逸哉雖聖賢並世終不能曰此爲治也陛下又患臺
閣禁令之不密人事請屬之不絕聽伊尹作迎客出入之制選司
徒更惡吏曰守寺門威禁由之竇未得爲禁之本也昔漢安帝時
少府竇嘉辟廷尉郭躬無罪之兄子猶見舉奏章劾紛紛近司隸
校尉孔羨辟大將軍狂悖之弟而有司嘿爾望風希指甚于受屬

選舉不曰實人事之大者也嘉有親戚之寵躬非社稷重臣猶尙如此曰今況古陛下自不督必行之罰曰絕阿黨之原耳伊尹之制與惡吏守門非治世之具也使臣之言少蒙察納何患于姦不削滅而養若昭等乎夫糾擿姦宄忠事也然而世憎小人行之者曰其不顧道理而苟求容進也若陛下不復攷其終始必曰違眾忤世爲奉公密行白人爲盡節焉有通人大才而更不能爲此邪誠顧道理而弗爲耳使天下皆背道而趨利則人主之所最病者陛下將何樂焉胡不絕其萌乎夫先意承旨曰求容美率皆天下淺薄無行義者其意務在于適人主之心而已非欲治天下安百姓也陛下何不試變業而示之彼豈執其所守曰違聖意哉夫人臣得人主之心安業也處尊顯之官榮事也食千鍾之祿厚實也人臣雖愚未有不樂此而喜于迁者也迫于道自彊耳誠曰爲陛下當憐而佑之少委任焉如何反錄昭等傾側之意而忽若人者

乎今者外有伺隙之寇內有貧曠之民陛下當大計天下之損益
政事之得失誠不可已怠也

魏志杜
畿傳

奏事

漢故事人民疾病責之司徒

御覽二百七引魏名
臣奏黃門杜恕奏

家事戒稱張閣

張子臺視之如鄙樸人然其心中不知天地閒何者為美何者為
惡毅然伯與陰陽合德者作人如此自可不富貴然而患禍當何
從而來世有高亮如子臺者皆多力慕體之不如也

魏志郗原傳
御覽五百九

三十

賜進士出身二品銜廣東等處提刑按察使司按察使兼管驛傳事務黃岡王毓藻校刊

全三國文卷四十二

烏程嚴可均校輯

魏四十二

杜恕二

體論

謹案隋志儒家杜氏體論四卷、魏幽州刺史杜恕撰、舊新唐志同、恕字務伯、晉征南大將軍杜豫之父也、官御史中丞、出刺幽州、曰斬鮮卑小子一人、爲程喜所劾、免爲庶人、徙章武、阮武謂恕曰、今向閑暇、可潛思成一家言、遂著體論八篇、又著興性論一篇、嘉平四年卒、于徙所、魏志有傳、八篇者、一曰君、二臣、三言、四行、五政、六法、七聽察、八用兵、四卷者、卷凡二篇、其書蓋亡于唐末、羣書治要載有六千餘言、不著篇名、審觀知是君臣行政法、聽察六篇、其餘言篇用兵篇略見御覽六帖、而意林已自敘

終焉今錄出校定爲一卷恕又有篤論別載千後嘉慶二十年
歲次乙亥二月既望

君第一

人主之大患莫大乎好名人主好名則羣臣知所要矣夫名所曰
名善者也善脩而名自隨之非好之之所能得也苟好之甚則必
僞行要名而姦臣已僞事應之一人而受其慶則舉天下應之矣
君曰僞化天下欲貞信敦樸誠難矣雖有至聰至達之主由無緣
見其非而知其僞況庸主乎人主之高而處隩譬猶遊雲夢而迷
惑當借左右曰正東西者也左曰功巍巍矣右曰名赫赫乎今日
聞斯論明日聞斯論苟不校之曰事類則人主瞶然自曰爲名齊
平堯舜而化洽乎泰平也羣臣瑣瑣皆不足任也堯舜之君宜獨
斷者也不足任之臣當受成者也曰獨斷之君與受成之臣帥詔
僞之俗而天下治者未之有也夫聖人之脩其身所曰御羣臣也

所曰化萬民也其法輕而易守其禮簡而易持其求諸已也
誠其化諸人也漢苟非其人道不虛行苟非其道治不虛應
是曰古之聖君之于其臣也疾則視之無數死則臨其大斂小斂
爲撤膳不舉樂豈徒色取仁而實違之者哉乃慘怛之心出于自
然形于顏色世未有不自然而能得人自然者也色取仁而實違
之者謂之虛不曰誠待其臣而望其臣曰誠事已謂之愚虛愚之
君未有能得人之死力者也故書稱君爲元首臣爲股肱期其一
體相須而成也而險舊作儉
呂意改僞淺薄之士有商鞅韓非申不害者
專飾巧辯邪僞之術曰熒惑諸侯著法術之書其言云尊君而卑
臣上曰尊君取容于人主下曰卑臣得售其姦說此聽受之端參
言之要不可不慎也元首已尊矣而復云尊之是已君過乎頭也
股肱已卑矣而復曰卑之是使其臣不及乎手足也君過乎頭而
臣不及乎手足是離其體也君臣體離而望治化之治未之前聞

也。且夫術家說又云：明主之道，當外御羣臣，內疑妻子。其引證連類，非不辯且悅也。然不免于利口之覆國家也。何已言之。夫善進不善無由入，不善進善亦無由入。故湯舉伊尹，而不仁者遠。何畏乎驩兜？何遷乎有苗？夫奸臣賊子，下愚不移之人，自古及今，未嘗不有也。百歲一人，是謂繼踵；千里一人，是爲比肩。而舉已爲戒，是猶一噎而禁人。本脫人字，依長短經是非引加。食也。噎者雖少，餓者必多。未知奸臣賊子處之云何？且令人主魁然獨立，是無臣子也。又誰爲君父乎？是猶斃其枝而欲根之蔭，揜其目而欲視之明，襲獨立之跡而願其扶疏也。夫徇名好術之主，又有惑焉。皆曰：爲君之道，凡事當密。人主苟密，則羣臣無所容其巧，而不敢怠于職。此卽趙高之敎二世，不當聽朝之類也。是好乘高履危，而笑先僵者也。易曰：機事不密，則害成。易稱機事，不謂凡事也，不謂宜共而獨之也，不謂釋公而行私也。人主欲已之匿病飾非，而人臣反已之竊寵擅權，疑

侶之間可不察歟。夫設官分職、君之體也。委任責成、君之體也。好謀無倦、君之體也。寬已得眾、君之體也。含垢藏疾、君之體也。不動如山、君之體也。難知如淵。意林作陰、避唐諱。因改就孫子也。君之體也。君有君人之體、其臣畏而愛之。此文王所已戒百辟也。夫何法術之有哉。故善爲政者、務在于擇人而已。及其求人也、總其大略、不具其小善、則不失賢矣。故曰：記人之功、忘人之過、宜爲君者也。人有厚德、無問其小節；人有大譽、無訾其小故。自古及今、未有能全其行者也。和氏之璧、不能無瑕；隋侯之珠、不能無纈。然天下寶之者、不曰小故妨大美也；不曰小故妨大美。故能成大功、夫成大功、在已而已。何具之于人也。今之從政者、稱賢聖則先乎商韓、言治道則師乎法術、法術之御世、有侶鐵轡之御馬、非必能制馬也。適所已梏其手也。人君之數至少、而人臣之數至眾、已至少御至眾、其勢不勝也。人主任術而欲御其臣、無術其勢不禁也。俱任術則至少者不

便也。故君使臣曰禮，則臣事君曰忠。晏平仲對齊景公：君若棄禮，則齊國五尺之童皆能勝嬰，又能勝君，所曰服者，曰有禮也。今末世棄禮任術之君之于其身也，得無所不能勝五尺之童子乎？三代之亡，非其法亡也，御法者非其人也。苟得其人，王良造父能曰腐索御奔駟，伊尹太公能曰敗法御悍民，苟非其人，不由其道，索雖堅馬必敗。法雖明，民必叛。奈何乎萬乘之主，釋人而任法哉？且世未嘗無賢也，求賢之務非其道，故常不過之也。除去案除去猶言且無論湯武聖人之君，任賢之功近觀齊桓中才之主耳，猶知勞于索人，逸于任之不疑。子糾之親，不忘射鉤之怨，蕩然而委政焉，不已明乎？九合諸侯，壹匡天下，不已榮乎？一曰仲父，二曰仲父，不已優乎？孰與秦二世懸石程書，愈密愈亂，爲之愈勤，而天下愈叛，至于弑死，曰斯二者觀之，優劣之相懸，存亡之相背，不亦昭昭乎？夫人主莫不欲安存而惡危亡，莫不欲榮樂而惡勞辱也，終恆不得其所。

欲而不免乎所惡者何誠失道也欲宮室之崇麗也必懸重賞而求良匠內不曰阿親戚外不曰遺疏遠必得其人然後授之故宮室崇麗而處之逸樂至于求其輔佐獨不若是之公也唯使辟親近者之用故圖國不如圖舍是人主之大患也使賢者爲之與不肖者議之使智者慮之與愚者斷之使修士履之與邪人疑之此又人主之所患也夫賞賢使能則民知其方賞罰明必則民不偷兼聰齊明則天下歸之然後明分職序事業公道開而私門塞矣如此則忠公者進而佞悅者止虛僞者退而貞實者起自羣臣已下至于庶人莫不修己而後敢安其職業變心易慮反其端慤此之謂政化之極審斯論者明君之體畢矣

羣書治要

臣第二

凡人臣之于其君也猶四肢之戴元首耳目之爲心使也皆相須而成爲體相得而後爲治者也故虞書曰臣作股肱耳目而脣

亦云汝爲君目將司明也汝爲君耳將司聰也然則君人者安可
已斯須無臣臣人者安可已斯須無君斯須無君斯須無臣是斯
須無身也故臣之事君猶子之事父而加敬焉父子至親矣然其
相須尙不及乎身之與手足也身之于手足可謂無閒矣然而聖
人猶復督而致之故其化益溥其恩益密自然不覺教化之移也
奸人離而閒之故使其臣自疑于下而令其君孤立乎上君臣相
疑上下離心乃奸人之所已爲劫殺之資也然夫中才之主明不
及乎治化之原而感于僞術倡是之說故備之愈密而奸人愈甚
譬猶登高者愈懼愈危愈危愈墜孰如早去邪徑而就夫大道乎
凡士之結髮束脩立志于家門欲已事君也宗族稱孝焉鄉黨稱
悌焉及志乎學自託于師友師貴其義而友安其信孝悌已篤信
義又著已此立身已此事君何待乎法然後爲安及其爲人臣也
稱才居位稱能受祿不面譽已求親不偷悅已苟合公家之利知

無不爲也。上足曰尊主安國，下足曰豐財阜民。謀事不忘其君，圖身不忘其國，內匡其過，外揚其義，不下比，曰闇上，不上同，曰病下。見善行之如不及，見賢舉之如不容，內舉不避親戚，外舉不避仇讎，程功積事而不望其報，進賢達能而不求其賞，道塗不爭險易之利，見難而無苟免之心，其身可殺而其守不可奪，此直道之臣所曰佐賢明之主，致治平之功者也。若夫主明而臣闇，主闇而臣僞，有盡忠不見信，有見信而不盡忠，溷淆于臣主之分，出入于治亂之間，或被褐懷玉，曰待時，或巧言令色，曰容身，又可勝盡哉。是曰古之全其道者，進則正，退則曲，正則與世樂其業，曲則全身歸于道，不傲世，曰華眾，不立高，曰爲名，不爲苟得，曰偷安，不爲苟免而無恥，夫脩之于鄉閭，壞之于朝廷，可惜也。脩之于己立，壞之于閭閻，可惜也。君子惜茲二者，是曰有殺身，曰成仁，無求生，曰害仁，況害仁，曰求寵乎。故孔子曰：不義而富且貴，于我如浮雲。若夫智

慮足已圖國忠貞足已悟主公平足已懷眾溫柔足已服人不誹
毀已取進不刻人已自入不苟容已隱忠不耽祿已傷高通則使
上恤其下窮則教下順其上故用于上則民安行于下則君尊可
謂進不失忠退不失行此正士之義爲臣之體也凡趣舍之患在
于見可欲而不慮其敗見可利而不慮其害故動近于危辱昔孫
叔敖三相楚國而其心愈卑每益祿而其施愈博位滋高而其禮
愈恭正考父偃僕而走晏平仲辭其賜邑此皆守滿已沖爲臣之
體也夫不憂主之不尊于天下而唯憂己之不富貴此古之所謂
庸人而今之所謂顯士小人之所以榮慕而君子之所以爲恥也凡
人臣之論所已事君者有四有賢主之臣有明主之臣有中主之
臣有庸主之臣上能尊主下能壹民物至能應事起能辨教化流
于下如影響之應形聲此賢主之臣也內足已壹民外足已拒難
民親而士信之身之所長不己拂君身之所短不己當有取功此明

主之臣也。君有過事，能壹心同力，相與諫而正之，曰解國之大患，成君之大榮。此中主之臣也。端穀而守法，壹心曰事君。君有過事，雖不能正諫，其憂見于顏色，此庸主之臣也。曰庸主之臣，事賢主則從，曰賢主之臣，事庸主則凶。古之所曰成其名者，皆度主而行者也。脩之在己，而遭遇有時，是曰古人抱麟而泣也。夫名不可曰虛偽取也，不可曰比周爭也。故君子務修諸內，而讓之于外，務積于身，而處之曰不足。夫爲人臣，其猶土乎？意林作猶如土也萬物載焉，而不辭其重；水瀆汙焉，而不辭其下；草木殖焉，意林作植而不辭其功。此成功而不處，爲臣之體也。若夫處大位，任大事，荷重權，于萬乘之國，必無後患者，其上莫如推賢讓能，而安隨其後，不爲管仲，卽爲鮑叔耳。其次莫如廣樹而竝進之，不爲魏成子，卽爲翟璜耳。安有壅君蔽主專權之害哉！此事君之道，爲臣之體也。羣書治要

言第三

東脩之業其上在于不言其次莫如寡辭諺曰使口如鼻至老不失白孔六帖三十御覽三百六十七引杜恕論當在言篇

行第四

夫行也者舉趾所由之徑路也東西南北之趣舍也君子小人之分界也吉凶榮辱之皐白也由南則失北也由東則失西矣由乎利則失爲君子由乎義則失爲小人吉凶榮辱之所由生義利爲之本母也是已君子慎趣舍焉羣書治要

君子居必選鄉游必擇士林意

夫君子直道已耦世小人枉行已取容君子揜人之過已長善小人毀人之善已爲功君子寬賢容眾已爲道小人微訐懷詐已爲智君子下學而無常師小人恥學而羞不能此又君子小人之分界也君子心有所定計有所守智不務多務行其所知行不務多務審其所由安之若性行之如不及小人則不然心不在乎道義

之經口不吐乎訓誥之言不擇賢已託身不力行已自定隨轉如流不知所執此又君子小人之分界也君子之養其心莫善于誠夫誠君子所已懷萬物也天不言而人推高焉地不言而人推厚焉四時不言而人期焉此已至誠者也誠者天地之大定而君子之所守也天地有紀矣不誠則不能化育君臣有義矣不誠則不能相臨父子有禮矣不誠則疏夫婦有恩矣不誠則離交接有分矣不誠則絕已義應當曲得其情其唯誠乎羣書治要
可已使鬼者錢也可已使神者誠也御覽八百三十六

政第五

孔子曰爲政以德又曰導之以德齊之以禮有恥且格然則德之爲政大矣而禮次之也夫德禮也者其導民之具歟大上養化使民日遷善而不知其所已然此治之上也其次使民交讓處勞而不怨此治之次也其下正法使民利賞而勸善畏刑而不敢爲非

此治之下也。夫善御民者，其猶御馬乎？正其銜勒，齊其轡策，均馬力，和馬心，故能不勞而極千里。善御民者，壹其德禮，正其百官，齊民力，和民心，是故令不再而民從，刑不用而天下化治。所貴聖人者，非貴其隨罪而作刑也，貴其防亂之所生也。是已至人之爲治也。處國于不傾之地，積政于萬全之鄉，載德于不止之輿，行令于無竭之倉，使民于不爭之塗，開法于必得之方。處國下四十二民字依意林加有小罪，必求其善，已赦其過；民有大罪，必原其故，已仁輔化。是故上下親而不離，道化流而不蘊。夫君子欲政之速行，莫如已道御之也。皋繇瘡而爲大理，有不貴乎言也；師曠盲而爲大宰，有不貴乎見也；唯神化之爲貴，是故聖王冕而前旒，所已蔽明；黈纆充耳，所已揜聰也；覲夫獎俗偷薄之政，當有字耳目已效聰明，設倚伏已揆民情，是爲已軍政處其民也。而望民之信向之，可謂不識乎分者矣。難哉爲君也！夫君尊嚴而威高，遠而危；民者卑賤而恭，愚弱

而神惡之則國亡愛之則國存當有故庶民水也君子舟也水所

已載舟亦所已覆舟庶民下十八字依意林加御民者必明此要故南面而臨

官不敢已其富貴驕人有諸中而能圖外取諸身而能噶遠觀一

物而貫乎萬者已身為本也夫欲知天之終始也今日是也欲知

千萬之情一人情是也故為政者不可已不知民之情當有

字然後民乃從令已所不欲不施之于人令安得不從乎故善政

者簡而易行則民不變法存身而民象之則民不怨近臣便嬖百

官因之而後達則羣臣自汙也是已為政者必慎擇其左右左右

正則人主正矣人主正則夫號令安得曲邪天下大惡有五而盜

竊不豫焉一曰心達而性險二曰行僻而志堅三曰言偽而辭辯

四曰記醜而喻博五曰循非而言澤此五者有一于人則不可已

不誅況兼而有之置之左右訪之已事而人主能立其身者未之

有也羣書治要

法第六

夫淫逸盜竊百姓之所惡也我從而刑之殘之刻剝之雖過乎當百姓不巳爲暴者公也怨曠飢寒亦百姓之所惡也遁而陷于法我從而寬宥之雖及于刑必加隱惻焉百姓不巳我爲偏者公也我之所重百姓之所憎也我之所輕百姓之所憐也是故賞約而勸善刑省而禁奸由此言之公之于法無不可也過輕亦可過重亦可私之于法無可也過輕則縱姦過重則傷善今之爲法者不平公私之分而辯輕重之文不本百姓之心而謹奏當之書是治化在身而走求之也聖人之于法也已公矣然猶身懼其未也故曰與其害善寧其利淫知刑當之難必也從而救之曰化此上古之所務也後之治獄者則不然未訊罪人則驅而致之意謂之能下不揆獄之所由生爲之分而上求人主之微旨曰爲制謂之忠其當官也能其事上也忠則名利隨而與之驅世而陷此曰望化

道之隆亦不幾矣。凡聽訟決獄必原父子之親立君臣之義權輕重之敘別淺深之量悉其聰明致其忠愛然後察之疑則與眾共之眾疑則從輕者所曰重之也非爲法不具也曰爲法不獨立當須賢明共聽斷之也故舜命皋繇曰汝作士惟刑之恤又復加之曰三諱諱與訊通眾所謂善然後斷之是曰爲法參之人情也故春秋傳曰小大之獄雖不能察必曰情而世俗拘愚苛刻之吏曰爲情也者取貨賂者也立愛憎者也祐親戚者也陷怨讎者也何世俗小吏之情與夫古人之懸遠乎無乃風化使之然邪有司曰此情疑之羣吏人主曰此情疑之有司是君臣上下不通相疑也不通相疑欲其盡忠立節亦難矣苟非忠節免而無恥免而無恥則民安所厝其手足乎春秋之時王道浸壞教化不行子產相鄭而鑄刑書偷薄之政自此始矣逮至戰國韓任申子秦用商鞅連相坐之法造參夷之誅至于始皇兼吞六國遂滅禮義之官專任刑罰

而奸邪竝生天下叛之高祖約法三章而天下大悅及孝文卽位
躬脩玄默論議務在寬厚天下化之有刑厝之風至于孝武徵發
煩數百姓虛耗窮民犯法酷吏擊斷姦宄不勝于是張湯趙禹之
屬條定法令轉相比況禁固舊按云疑同積密文書盈于機格典者不
能徧觀姦吏因緣爲市議者咸怨傷之凡治獄之情必本所犯之
事曰爲之主不放訊不旁求不貴多端曰見聰明也故律正其舉
效舊按云疑同之法參伍其辭曰求實也非所曰飾實也但當參伍聰
明之耳目不使獄吏斷練飾治成辭于手也孔子曰古之聽獄求
所曰生之也今之聽獄求所曰殺之也故斥言曰破律詆案曰成
法執左道曰亂政皆王誅之所必加也羣書治要

聽察第七

夫聽察者乃存亡之門戶安危之機要也若人主聽察不博偏受
所信則謀有所漏不盡良策若博其觀聽納受無方攷察不精則

數有所亂矣。人主曰：獨聽之聰，攷察成敗之數，利害之說，謀而並至，曰：干閔聽如此，誠至精之難，在于人主耳，不在竭誠納謀，盡己之策者也。若人主聽察不差，納受不謬，則計濟事，全利倍功，大治隆而國富，民強而敵滅矣。若過聽不精，納受不審，則計困事敗，利喪功虧，國貧而兵弱，治亂而勢危矣。聽察之所攷，不可不精，不可不審者，如此急也。凡有國之主，不可謂舉國無深謀之臣，閭朝無智策之士也。在聽察所攷，精與不精，審與不審耳。何已驗其然乎？在昔漢祖者，聰聽之主也，納陳恢之謀，則下南陽，不用婁敬之計，則困平城。廣武君者，策謀之士也，韓信納其計，則燕齊舉，陳餘不用其謀，則泚水敗。由此觀之，漢祖之聽，未必一閭一聰也，在于精與不精耳。廣武之謀，非爲一拙一工也，在用與不用耳。不可謂事濟者，有計策之士，覆敗者，無深謀之臣也。吳王夫差，拒子胥之謀，納宰嚭之說，國滅身亡者，不可謂無深謀之臣也。楚懷王拒屈原

之計、納靳尚之策、沒秦而不反者、不可謂無計畫之士也。虞公不用宮奇之謀、滅于晉、仇由不聽赤章之言、亡于智氏、蹇叔之哭、不能濟崤、繩之覆、趙括之母、不能救長平之敗、此皆人主之聽不精、不審耳。由此觀之、天下之國、莫不皆有忠臣謀士也、或喪師敗軍、危身亡國者、誠在人主之聽不精、不審、取忠臣謀士、將何國無之乎、羣書治要

臣已爲忠良慮、治益國之臣、必竭誠納謀、懇惻而不隱者、欲已究盡治亂之數、舒展安危之策耳、故準聖主明君、莫不皆有獻可退否、納忠之臣也、昔者帝舜、大聖之君也、猶有咎繇獻謨、夏禹納戒、暨至殷之成湯、周之文武、皆亦至聖之君也、然必俟伊尹爲輔、呂尚爲師、然後乃能興功濟業、混一天下者、誠視聽之聰察、須忠良爲耳目也、由此觀之、忠良慮治益國之臣者、得不師蹤往古、襲迹前聖、投命自盡、已輔佐視聽乎、夫人君者、已至尊之聰、聽總萬機、

而賢

舊校云賢當作監

之曰至貴之明察料治亂而攷焉將當能皆窮究

其孔要料盡其門戶乎其數必用有所遺漏不有忠臣良謀輔佐

視聽者則凡百機微有所不聞矣何曰論其然乎夫人君所曰尊

異于人者順志養真也歡康之虞則嚴樂盈耳玩好足目美色充

慾麗服適體遠眺迴望則登雲表之崇臺逍遙容豫則歷飛閣之

高觀嬉乎綠水之清池遊乎桂林之芳園弋鳧與鴈從禽逐獸行

與毛嬌俱入與西施處將當何從體覺窮愁之戚悴識鰥獨之難

堪乎食則膳鼎几俎庶羞兼品酸甘盈備珍饌充庭奏樂而進鳴

鐘而徹閒饋代至口不絕味將當何從

據前後文當有體字

覺飢餒之隄艱

識困餓之難堪乎暑則被霧縠襲纖絺處華屋之大廈居重蔭之

玄堂褰羅帷曰來清風烈

當作烈

凝冰曰遏微暑侍者御粉扇典衣

易輕裳飄飄焉有秋日之涼將當何從體覺炎夏之鬱赫識毒熱

之難堪乎寒則服綿袍褰輕裘綿

舊校云綿疑綿

衾貂裘疊茵累席居陳

密之煖室處複帝之重幄熾猛炭于室隅曰起溫御玉卮之旨酒
曰禦寒燄燄焉有夏日之熱將當何從體覺隆冬之慘烈識毒寒
之難堪乎此數者誠無從得而知之者也凡百機微如此比類者
必用遺漏有所未詳也如此則至忠之臣者得不輔佐視聽曰起
寤遺忘乎羣書治要

用兵第八

天生五材民竝用之廢一不可誰能去兵故兵之來也久矣所曰
威不軌而昭文德所曰討彊暴而除殘賊也聖人曰興亂人曰廢
廢興存亡皆兵之由也昔五帝不能假況衰世乎

濫殺無辜之民曰養不義之君非兵之體也殫天下之財曰贍一
人之求非兵之體也怙其率卒之彊矜其變詐之謀欲曰定威取
名非兵之體也虜其君隸其臣遷其社易其民非兵之體也故夫
霸王之用兵也始之曰義終之曰仁將曰存亡非曰危存也將曰

禁暴非曰爲暴也

兵之來也、曰除不義而援德、克其國而不傷其民、廢其君而不易其政、尊其後、秀顯其賢良、賑其孤寡、恤其窮困、百姓聞之、欣然簞食壺漿、曰迎其君、笑之遲也。湯武之師、用兵之上也。誰與交鋒而接刃哉。

所謂善用兵者、先弱敵而後戰者也。若乃征之曰義、曰責其過、振之曰武、曰威其淫、懷之曰德、曰誓其民、置之曰仁、曰救其危、此四者、用兵之體、所謂因民之欲、乘民之力也。

治家國、理境內、施仁義、布德惠、明勸賞、黜幽昧、功臣附親、士卒和睦、上下一心、君臣同德、指麾而響應、此上兵之體也。地廣民眾、主賢將能、國富賞罰信、未至交兵而敵人亡遁、此次兵之體也。知地之形、因險阨之利、明奇正之變、審進退之宜、援枹而鼓之、黃塵四起、乃曰決勝、此用兵之下、非兵之體也。

夫德義足已懷天下之民，事業足已當天下之息，選舉足已得賢

才之用，則兵之所加，若勁風振槁，此兵之體也。已上六條，並御覽二百七十一

恕性疏情，但飽食而已。家有書傳，頗嘗涉歷。父憂行喪，在禮多愆。

孝聲不聞，後除中郎。又作黃門郎，同朝友人問余志，余荅曰：見大

臣論議，或黨甲苦乙所親，或黨乙謗甲所親，余處甲乙之間，幸無

毀譽耳。意林

呂爲人倫之大綱，莫重于君臣立身之基本，莫大于言行。安上理

民，莫精于政法，勝殘去殺，莫善于用兵。夫禮也者，萬物之體也，萬

物皆得其體，無有不善，故謂之體論。三國志本傳引杜氏新書蓋用體論自敘備

篤論

謹案隋志雜家梁有篤論四卷，杜恕撰。亡。舊新唐志皆于錄。至

宋復亡。魏志本傳稱恕所著，有體論、興性論，無篤論。據意林引

篤論，水性勝火，人性勝志，攷實性行二事，證知興性卽篤論之

首篇據意林及御覽證知裴松之所引杜氏新書卽篤論之末篇其書前數篇出恕手後述敘家世歷官引及魏書并引及王隱晉書證知東晉時編附故稱新書猶今之全書而篤論其總名也故梁七錄唐志有篤論無新書余既校輯體論因并采錄篤論依意林次第編定之本傳三疏皆當在篤論中既入文集不復載也嘉慶二十年歲次乙亥二月十九日

水性勝火分之曰釜甌則火強而水弱人性勝志分之曰利欲則

志強而性弱

意林

攷實性行莫過于鄉閭校才選能莫善于對策

意林案此二條當是典性論

漢伐匈奴取胡麻蒲萄大麥苜蓿示廣地

藝文類聚八十七引杜恕篤邊論案此條篤

論之言邊事者遂是篇名

聖人之制刑也非曰害民也將曰利民也故民從而安之非曰陷民也將曰導民也故民從而化之斷一人之獄而天下義之是安

之也斷一人之獄而天下伏之是化之也當于民心合于道理所

斷于民者不行于身公之也御覽六百三十六

日給之華與柰相伯也柰結實而日給零落虛偽之態與真實相

伯也虛偽敗而真實成御覽九百九十

夫萍之浮與菱之浮相伯也菱植根萍隨波是曰堯舜歎巧言之

亂德仲尼惡紫之奪朱御覽九百七十五又一千

杜氏始出帝堯在周為唐杜氏漢世有杜周杜欽杜鯨意林案

畿字伯侯魏書有傳意林案魏書王流撰沈卒于晉泰始二年魏書之成宋必在嘉平

前則敘傳晉人編附

畿為河東太守平虜將軍劉勳為太祖所親貴震朝廷嘗從畿求

大璫畿拒曰他故後勳伏法太祖得其書歎曰杜畿可謂不媚于

寵者也稱畿功美曰下州郡曰昔仲尼之于顏子每言不能不歎

既情愛發中又宜率馬曰驥今吾亦冀眾人仰高山慕景行也魏志

杜畿傳注御覽九百六十五並引杜氏新書

畿長子恕字務伯恕弟理字務仲少而機察精要畿奇之故名之曰理年二十一而卒少子寬字務叔清虛玄靜敏而好古已名臣門戶少長京師而篤志博學絕于世務其意欲揆蹟索隱由此顯名當塗之士多交焉舉孝廉除郎中年四十二而卒經傳之義多所論駁皆草創未就惟刪集禮記及春秋左氏傳解今存于世魏志本傳注引杜氏新書意林引篤論案意林作畿長子理字務仲少而機察故名曰理少子恕字務伯意林轉寫不無倒誤應曰伯仲叔為次今依

本傳注為正

恕少與馮翊李豐俱為父任總角相善及各成人豐砥礪名行曰要世譽而恕誕節直意與豐殊趣豐竟馳名一時京師之士多為之游說而當路者或曰豐名過其實而恕被褐懷玉也由是為豐所不善恕亦任其自然不力行已合時豐已顯仕朝廷恕猶家居自若明帝已恕大臣子擢拜散騎侍郎數月轉補黃門侍郎魏志本傳

注引杜氏新書

時李豐爲常侍黃門郎袁侃見轉爲吏部郎荀悝出爲東郡太守

二人皆恕之同班友善魏志本傳注引杜氏新書

陛下謂曰今世無良才朝廷乏賢佐豈可追望前世之稷契坐待

後來之俊乂可能治乎意林引篤論案此疏魏志本傳有全文疑本傳所載三疏皆當在篤論中今既入

文集不復具載

恕遂去京師營宜陽一泉陽因其壘塹之固小大家焉明帝崩時

人多爲恕言者魏志本傳注引杜氏新書

恕在河東坐臥恆避父住處意林

程喜欲恕折節謝已諷司馬宋權卿覽示之曰微意恕答權書曰

況示委曲夫法天下事曰善言相待無不致快也曰不善意相待

無不致嫌隙也而議者言凡人天性皆不善不當待曰善意更墮

其調中僕得此輩便欲歸蹈東海乘桴耳不能自諧在其閒也然

目年五十二不見廢棄者

者字依御覽加

頗亦遭明達君子亮其本心若

不見亮使人剗心著地正與數斤肉相侶耳

耳字依御覽加

何足有所明

邪

邪字依御覽加

故終不自解說程征北功名宿著在僕前甚多有人出

征北乎若令下官事無大小咨而後行則非上司彈繩之意若咨

而不從又非上下相順之宜故推一心順一意直而行之耳殺胡

之事天下謂之是邪是僕諧也呼為非邪僕自受之無所怨咎程

征北明之亦善不明之亦善諸君子自共為其心耳不在僕言也

喜于是遂淡文効恕

魏志本傳注引杜氏新書御覽三百七十六引篤論

阮武字文業闊達博通淵雅之士位止清河太守武弟炳字叔文

河南尹精意醫術撰藥方一部炳子坦字弘舒晉太子少傅平東

將軍坦弟柯字士度

魏志本傳注引杜氏新書

賜進士出身
品銜廣東等處提刑按察使司按察使兼管驛傳事務黃岡王毓藻校刊